

**PEMBERITAHUAN PERTANYAAN MESYUARAT PERTAMA,
PENGGAL KEDUA, PARLIMEN KEEMPAT BELAS,
MAJLIS MESYUARAT DEWAN RAKYAT**

PERTANYAAN : LISAN

DARIPADA : TUAN PANG HOK LIONG (LABIS)

TARIKH : 20 MAC 2019 (RABU)

SOALAN

Minta **MENTERI PERTAHANAN** menyatakan strategi yang digunakan oleh PERHEBAT untuk membantu veteran mendapatkan kerja dan keberkesanan strategi tersebut dalam mengurangkan kadar pengangguran dalam kalangan veteran, terutamanya kumpulan baru berpencen (dalam lingkungan usia 40-50).

JAWAPAN

Tuan Yang di-Pertua,

Selain dari tugas hakiki iaitu merancang, mengurus dan melaksana program latihan kemahiran dan keusahawan kepada bakal pesara dan veteran ATM, PERHEBAT juga mengambil inisiatif membantu graduan PERHEBAT dan veteran ATM serta keluarga mereka mendapat pekerjaan. PERHEBAT dari semasa ke semasa meneruskan usaha untuk memperluaskan jalinan strategik dengan agensi kerajaan, syarikat swasta dan industri demi kepentingan bakal pesara tentera dan veteran ATM.

Strategi PERHEBAT adalah mengadakan pertemuan, perbincangan dan memeterai perjanjian persefahaman (MoU) dengan agensi kerajaan, syarikat swasta, Syarikat Berkaitan Kerajaan (GLC) dan pihak industri yang memerlukan tenaga kerja dan kepakaran.

Memorandum Persefahaman (MoU) yang telah berjaya dimeterai dengan pelbagai pihak ini merangkumi skop penempatan pekerjaan untuk veteran ATM dan keluarga; penempatan Latihan Sambil Kerja (LSK); penempatan pelatih untuk Latihan Dalam Industri; pengiktirafan pengalaman, pengetahuan dan kemahiran yang dimiliki anggota ATM dan veteran ATM; penempatan pengajar dan staf PERHEBAT di industri (*Return To Industry*); pengiktirafan kursus *homegrown* PERHEBAT dan modul nilai tambah, pembiayaan/penajaan yuran latihan kepada bakal pesara/veteran ATM bagi kursus-kursus berimpak tinggi; *place and train* dan *train and place*; aktiviti penyelidikan dan konsultasi; dan program pembangunan perniagaan keusahawanan dan francais.

Hasil pemeterian jalinan strategik/MoU yang dibuat serta disusuli pelan tindakan tersusun, telah memberi impak yang sangat positif dan sebagai contohnya seperti:

1. Kerjasama dengan Kementerian Sumber Manusia (KSM) melalui Program *Recognition Prior of Experiential Learning* (RPEL) yang bertujuan mengiktiraf pengalaman, pengetahuan dan kemahiran yang dimiliki anggota ATM dan Veteran ATM kelompok B40 menerusi penganugerahan Diploma Kemahiran Malaysia (DKM Tahap 4) dan Diploma Lanjutan Kemahiran Malaysia (DLKM Tahap 5) berdasarkan penilaian oleh Panel Penilai Jabatan Pembangunan Kemahiran (JPK), KSM dan pihak industri melalui kaedah temuduga dan pembentangan kertas projek. Sehingga kini seramai 1,352 orang telah mendapat pengiktirafan Diploma Kemahiran Malaysia (DKM) Tahap 4 dan 27 orang mendapat pengiktirafan Diploma Lanjutan Kemahiran Malaysia (DLKM) Tahap 5;

2. Kerjasama dengan *Federation of Malaysian Manufacturers* (FMM) Pulau Pinang yang melibatkan 40 syarikat dan Persatuan Industri Pulau Pinang pada tahun ini sahaja telah menawarkan 2 ribu peluang pekerjaan dalam bidang pekerjaan kolar biru dan kolar putih kepada veteran serta keluarga dan anak-anak anggota ATM. Manakala dalam tempoh dua tahun (2019 – 2020), FMM Pulau Pinang serta Persatuan Industri dan syarikat berkaitan bersedia menawarkan 20 ribu lagi peluang pekerjaan;

3. Kerjasama dengan syarikat Pelabuhan Tanjung Pelepas (PTP) Sdn Bhd Johor telah membuka peluang pekerjaan baru sebanyak 1 ribu pekerjaan dalam bidang *Operator Prime Mover* kepada bakal pesara dan veteran ATM serta anak-anak mereka; dan

4. Kerjasama dengan PERNAMA – 7 Eleven pula, peserta kursus Peruncitan PERHEBAT dan veteran ATM berpeluang memiliki perniagaan francais 7 Eleven melalui rangkaian perniagaan 7 Eleven seluruh negara.

Selain dari strategi jalinan strategik dengan pihak industri, pengurusan tertinggi PERHEBAT juga mengunjungi ketua-ketua kerajaan negeri untuk memberi taklimat serta mengadakan perbincangan bagi mendapatkan pandangan, sokongan dan bantuan kerajaan negeri agar keperluan bakal pesara dan veteran ATM serta keluarga mereka diberi perhatian melalui peluang latihan dan pekerjaan oleh agensi kerajaan negeri.